



کتابا رغبت اولماسا کتابی چاپ ائله‌ماق و یا اونو موفته‌سینه پایلاماغین فایداسی اولماجاچاق. رغبت اولمایان یئرده موفته پایلاماق کتابی ارزشدن سالماق اولور.

بعضی ارگانلار و سازمانلار کتابی ناشردن آلیب نفرلرینه هدیه کیمی پایلابیرلار. بو جور ایشلر هزینه‌لری هدر وئرماقدان غیری ایش دئییل. جامعه‌نین انسانلاری اؤزلرینی علمی ترقی‌یه محتاج بیلمه‌لیدیلر کی کتاب اوخوماغا رعیتلری اولسون و اونون نتیجه‌سینده دهفایدالی کتابلار یازیلیب ترجمه اولونسون.

جامعه‌میزده کتابا رغبتین اولماماسی‌نین اساس سبیلریندن بونلاری سایماق اولار:

1- انسانلاریمیز جامعه‌ده باشاماغا و موقعیت قازانماق اوچون علمی سطحلرینی چوخالتماغا احتیاج گؤرمورلر و بو سبیدن کتابا طرف میل‌لری اولمور.

2- جامعه‌میزده شفاهی فرهنگ هله یئرینه کتبی فرهنگه وئرمه‌یب. جماعتیمیز سواد اولمایان کئچمیشلره تکی ائشیتماغا داها رعیتلیدیلر تا اوخوماغا. اونلار سخنرانلیغا قولاق آسماغی اوخوماقدان داها چوخ راحت بیلیرلر. هر شئی شفاهی صورتده ائشیتماق ایستیرلر. مثلاً بیز دین فرهنگینی ترویج وئرماق اوچون کتابدان چوخ خطیلره و دین متخصصلرینه میدان وئریروق.

3- انسانلاریمیزین ذهنی قدیمی و سنتی‌دیر. یعنی موجود مسأله‌لرین تکرارینی سئویر و بو تکراردان یورولمور. بیر حالداکی انسانین ذهنی مسأله‌لره تحلیلی و انتقادی باخمالیدیر و تکراری بئیمه‌لیدیر.

4- اجتماعی علملر بیر جامعه‌ده بومی اولماییب و اونلارین درکی جماعتیمیزه چتین اولور. اجتماعی علملر آیری یئرده تولید اولور، رشد ائلیر و بیزیم جامعه‌ده ساده‌جه مصرف اولور و اونون تشکیل تاپماسیندا نقشیمیز اولمور. بونا گؤره بو علملر انسانلاریمیزا غیره گلیر.

5- مخصوصاً کتاب صحنه‌سینده تک تریبونلوق کاملاً گؤزه گلیر. جامعه‌ده نظریه وئرماغا و یئنه میدان آچیلمالیدیر. البته بو تک تریبونلوقو اساس عاملی کتاب یازانلاریمیزدیر کی تازا سؤز دئماقدان عاجزدیلر و قاباکیلاری سؤزلرینی چئینه‌ماقدان ساوایی ایش باشارمیرلار.

6- سیاسته بولانماق: جامعه‌ده اولان گروهلارین سؤزلری منطقسیز و دلیل‌سیز ده اولسا طرفدارلارین خوشونا گلیر. فقط بونا خاطر کی مقابل طرفین سؤزلرینه ضد اولور.

7- کتابا تماماً تجاری باخیلماق: کتابا جامعه‌میزده اولان باخیش تماماً اقتصادی‌دیر. مثلاً مؤلف‌لره کتاب بُنی تعلق تاپاندا اونلاردان گئدیپ تهران نمایشگاهیندان آماغا ایسته‌نیلیر یوخسا اونلارا بُن وئرلمیر. بو برنامه‌نین قصدی بودور کی کتاب نمایشگاهی‌نین اقتصادی آماری یوخاری اولسون و آیری هدف نظرده توتولماییب.